

AKASHVANI AIZAWL

REGIONAL NEWS UNIT



ADVISER TO CM

Adviser to Chief Minister (Agriculture) Dr Lorrain Lalpekliana Chinzah chuan Ngengpuikai-a Nul siamtute chu Sorkar hmalakna tha taka an tawiawm bakah mithiamte thurawn anga hna an thawk chu fakawm a tih thu a sawi.

Nimin Inrinni-a Lawngtlai District-a Ngengpuikai a Nul siamtute tan Training buatsaih a hmanpuina ah Adviser to Chief Minister chuan Ngengpuikai-a Nul siamtute thawhrah chu Lawngtlai khawpuiin kum tam tak chhung an inngahna a ni tawh tih sawiin, mihring pung chho zelah Thlai tharchhuah pawh a pung zel ati a,kuthnathawktuten tunlai thiamna hmanga hma an lak chu a pawimawh tih sawiin Ngengpuikaia Nul siamtute chu KVK Lawngtlai leh Horticulture Department ten theihtawp chhuaha hma an lakpui avanga hlawhtinna hmuh theiha a awm chu a lawmawm hle ani ati. Adviser to CM hian KVK leh Horticulture Department atanga Kuthnathawktute tanpuina a sem nghal a ni.

Ngengpuikai a Nul siamtute chuan an Nul tih changtlun nan leh Sorkar hmalakna hlawk zawka an chhawr theih nan Tui pump khawl leh Kawlphetha, Leilehna tur hmanrua an mamawh thu Adviser to CM hi an hrilha, Dr.Lorrain Lalpekliana Chinzah chuan an mamawh thlente chu a theih anga lo bawhzui a tum thu a hrilh a ni.

(Lalngheta Ralte PTC Lawngtlai)



BUANNEL

Mizo pi leh pu te hun atanga hmun hmingthang, Myanmar-a Buannel hmun chu kuminah tlawhtu an la awm mumal lo.

Buannel hmun enkawltu, Buannel Management Committee Secretary, Pu Lalnuntluanga hnen atanga thu dawn danin tun hnaiah Hualngo ram chhungah indona a thlen thin avangin Buannel enkawltute chuan hma an la ngam meuh lova, kum tin February leh March thla te hi Buannel tlawhna atana hun tha ber, Chhawkhlei leh Bingdi te an par vul hun, Buannel mawi lai ber mah nise, boruak dinhmun a that loh avangin Mizoram atang pawhin Buannel tlawh hi tum rih lo turin Mizo mipuite an ngen a ni.

Hetihlai hian Zokhawthara Assam Rifles duty ten ramri kana Myanmar lama teihawi an remti lova, Zokhawthar ral lehlama chakkhai mamawh lam turte chauh Ramri kan hi an phalsak thin a, hemi avang hian Rihdil tlawhtu pawh an tlem phah a, Rihdil tlawhtute chu darkar khat chauh hun an pe thin niin thu dawn a ni bawk.

(Lalhluipua, Champhai PTC)



MADC LAD

Mara Autonomous District Council-a Local Administrative Department (LAD) hmalakna hnuaia Siaha khawchhunga plastic atanga siamchhuah bottle leh a kaihnauih te LAD Department in Kg 40 chuang lei tawh in hemi atan hian cheng ₹8700 pek chhuak tawh a ni.

LAD hotute sawidanin Plastic bawhlhlawhte hi Siaha khawchhunga Bazar hmun pangnga - Meisatlah Market, College Vaih Market, New Siaha Market, Siahatlah Market leh Lorrain Market ah te Inrinni zing dar 6 atanga dar 8 vel thleng LAD a thawktu duty ten an lei khawm thin thu an sawi a, Plastic bawhlhawh zinga - Pepsi, Coca Cola leh Sting bur chu kg ah 35 a leiiin niin, tui bottle leh plastic bawhlhlawh dang chu kg ah cheng 25 a an lei thin thu an sawi bawk.

Local Administrative Department chuan a zawrhchhuahna tur an la hmu lo thu leh bawihawm phawt an tum thu leh a hlawma zawrhchhuah an tum thu an sawi bawk.

(CZ Hluna PTC Siaha)



LENGPUI LAND SCAM ISSUE-MP

Rajya Sabha MP Pu K.Vanlalvena chuan nimin khan Prime Minister Narendra Modi leh President Droupadi Murmu-i te hnenah Mizorama Indian Air Force te hmunhma lak tur chungchanga thil dik lo awm nia hriat te chhui tu tur Central Investigating Agency te tir lut tura ngen na a theh lut.

Pu K.Vanlalvena chuan ram venhimna atana thil pawimawh Mizoram chhunga din chu Mizo mipuite'n an pawm a. Hetih laiin mi hlemhle leh pamham ten dik lo taka sum an siamna hmanrua atan Mizoram leilung hman chu an rem tih loh thu Prime Minister leh President te hnenah hian ziakin a thlen a ni.

Rajya Sabha MP hian Indian Air Force ten Lengpui ram an lei dan a thil dik lo awm nia hriat zawng zawng te chhui chhuak a, dikna hailan a nih ngei theih nan Sawrkar laipui hnuaia dan bawhchhiatna chhuitu -central

investigating agency te hnena a rang thei ang bera thupek siam turin Prime Minister leh President te chu a ngen bawk a ni.

Congress Party leh MNF Party pawhin a hran ve ve in Indian Airforce hnena ram hralh chungchang hi CBI chhuitir turin hma an la a, Congress Party chuan CBI Mizoram Unit ah FIR thehlutin MNF Party hian Chief Vigilance Officer hnenah CBI chhuitir tura ngenna an thehlut a ni.

ZPM Party erawh chuan, CBI chhui tir an tum thu an sawi na in an thulh leh tih nimin khan ZPM Media Chairman, Revenue Minister Pu B Lalhhanzova chuan a sawi a, Minister chuan Congress party-in CBI Unit, Mizoramah FIR an thehluh tho avangin, ZPM PAC thurawn angin an thehlut leh dawn rih lo tih a sawi.

(Corr)



MEGHALAYA RESCUE OPERATION

Meghalaya-a lungalhthei khur puahna hmun, Mynsngat-ah chhanchhuah hna thawh chhunzawm zel a ni a, nimin khan ruang 2 hmuh belh lehin heng nen hian he vanduaiaa thlenga thi zat chu 27 an tling tawh a ni.

Puan tawh angin he khur hi dan lova kalpui a ni a, East Jaintia Hills dist Administration hnuaiah Executive Magistrate, police leh Directorate of Mineral Resources mite telna team 5-in dan lova lungalhthei khur siam zawn hna, ngawrh takin an thawk a, hriat theih chinah Umlawang hnuaia hmun 9 atangin lungalhthei MT 3197 leh Umthe-a hmun li atangin MT 351 an man tawh a, dan lova lungalhthei laihchhuah chungchangah hian FIR engemawzat thehluh a ni tawh bawk.

(NSD)

